



FASNACHT 2011

Mir hänn dr Lengscht!

Z Göschene sitzt dr Giovanni,
kunnt vo Como, haisst nit Nanni,
und hüült vor Schmärz, dä Biss macht wee,
bschtellt e Zwaier Kalterersee.
Übere Gotthard-Pass do käme
zytewyys die kaibe Brääme.
Är het gmaint, si syge dääne,
bisse hänn s en, jetz gits Drääne.
Är hüült und brielt, ho duli ho,
dr Boschillion isch au grad koo.
S isch die letschi Boscht vom Zgragge
s Ross und är mien zämmepagge.
Will vyl z gfärlig oobedure,
duet me vom e Bäärgloch schnuure.
En Inscheniöör*, dä woont in Gämf
[* so geschriiben isch s ebitz e Sämfi]
will das Loch dur Stai dört graabe,
duet am Ruum sich glyy scho laabe.
Är syg schyint s ebitzli eitel,
blaant e Tunnel vom Typ «Scheitel».
D Kasse fiert dr Escher Fredi
mit dr Striggbanggkappe Kredi.
Und bym Schaffe syg ai Gschnori
vo dr Società Lavori.
Die kemmen uss dr Lombardei
und mien doo lääbe fascht wie d Sei.
Griege kai Gäld und sinn vyl grangg,
und freue drab duet sich nur d Bangg.
S wird bort, gsprängt, pigklet, ghämmeret
dr Lungestaub belämmeret.
Si straigge, s isch ai Schreierei,
gschosse wird uff die Meuterei.
S sinn d «Vittime de lavoro»,
s Fazit vo däm Bauwärgg d'oro.
Für d Technigg ischs e Maischterwärgg,
und d Schwyz het s lengscht Loch dur e Bäärg.
130 Jeerli speeter
hersch im Bäärg wider Drumpeeter.
Durebrochen isch dä Stolle,
d Japse dien scho wider schmolle,
goot fascht bis Lugano Lido,
lenger ass dä z Hokkaido.
Noomool sinn mir Tunnelmaischter
dangg de Bäärgmineure-Gaischter.
Will mir z Basel glunge tigge,
dien mir au so Bläänli strigge.
Me will e Tunnel under d Stadt,
d Landschäftler finde das no glatt.
Dangg däm Milliarde-Krater
bisch no schnäller im Theater.
Au d Oschttangänte soll ins Loch,
isch d Idee vom Polit-Moloch.
Für d Fasnacht wär das Loch e Säge,
als Route für Guggen und Wääge.
Drum geen mir Mineure grad ans Wäärgg,
und piggle wyter am Spalebäärg.

kolibri reprofile basel

D Ladaarne-Uusstellig uff em Münschterplatz und d Waage-
und Reggwisyte-Uusstellig bi dr Kasäärne sin vom Määntig
znacht bis am Mittwuch demoorge! Dört und an de 3 Ver-
kaufsstand (CINS) in dr Stadt ka men au alli Zeedel und Schnit-
zelbängg, d Blaggedde und dr Rädabängg kaufe.